

## Kaersjmes in oos kingerjaore.

Kaersjmes viere in vreuger jaore,  
dae sjoane tied wie veer nog kinger waore.  
De geheimzinnigheid van de Kaersjnach,  
es de dere tege ein kalle, woort gezag.

Veer móste vreug op, 't waor dan sjus veer oer,  
e plaetsjke in de kèrk kriege waor 'ne ganse toer.  
De mam makde ós wakker, de ouge nog vol sjaop,  
zelfs d'r kleinste mós mèt,... 't erm sjaop.

de kleijer loge op d'r sjtool, zoa es gewènd,  
mak vlot, zag de mam, hie höbt deer e paar cent..  
Allein heim blieve, dat wól ouch gaar geine  
allemaol góngge veer mèt, de groate en de kleine.

Dao góngge veer dan, 't waor waal wied,  
van alle kante kaome de luuj, 't woort tied.  
't waor gans vraem, zoa vreug al te gaon,  
zou d'r groate kaersjsjtal ouch weer sjtaon.

In de kirk sjièlde d'r örgel, 't koar dat zóng,  
't waor sjus of in de lóch get hièmels hóng.  
Veer zaote in de kingerbensjkes bie d'r sjtal,  
dat veer e plaetsjke krege, waor houp en al.

lèrsj kaom de nachmès, hièl plechtig en lank,  
mèt vääol ceremonies en hièl vääol zank.  
Dao nao nog laesmèsse, e sjtök of twiè,  
mèh veer houwe geine aandach miè.

Veer bleve mèr nao 't sjtelke kieke  
en zoge, dat waore ouch gein rieke,  
Dao waor e krubke, 'ne aezel en d'r os,  
en de sjäöpkes vrote mèr get mos.



Maria zoot zoa gelökkig te kieke,  
häör kindje kós waal op 'n ingelke lieke.  
En 't kindje Jezus, dat lachde,.. ocherm,  
't loog zao naaksj,... houw dat waal werm?

Sint Joasep keek get rónnd, gans verwaeze,  
hae houw die twiè lever e good bèd gegaeve.  
D'r ingel baove d'r sjtal dae zjwaefde,  
en 't waor sjus of dae af en toe baefde.

Dae heel e groat lint baove ziene kop,  
zingend, "Gloria in Exelcis" sjting dao op.  
De herdersj houwe dae muziek gehuèrd,  
en kaome kieke wat dao waor gebuèrd.

De kaertskes brante, 't groat leech waor oet,  
Ich veul noe nog de sjoewel op mien hoed  
Veer vrógte ós aaf, is 't nog neet gedaon,  
want dan kènne v'r weer nao heim gaon.

In d'r duuster zint v'r nao heim gegange,  
en höbbe dao um de kachel gesjtange,  
D'r pap verzörgde in d'r sjtal ièrsj 't við  
en de mam doog binne nog vädì miè.



Werme poetes en melk moste zörge,  
dat 't waor 'ne sjoane Kaersjmörge.  
'n sjnij wèk, paeperkook en get te drinke,  
wat is 't fien, dao nog ins aan te dinke.

Veur ós is dae kingertied gedaon,  
al wille veer nog ins in die sjoon sjtaon.  
't laeve hat gegaeve en genómme,  
Kaersjmès zal ouch noe weer kómme.

't Kaersjkind is gebaore veur 2000 jaor,  
umdat 't zoa gaer ónger de luuj waor,  
't wilt ós verlossing bringe, vreej en krach,  
en dat is 't geheim van de Kaersjnach.

Dré Kickken